



弇州山人年譜

田漢雲點校





弇州山人年譜

明世宗嘉靖五年丙戌十一月五日公生。

公諱世貞，字元美，號弇州，一號鳳洲。太倉州人。系出琅邪，爲晉始興文獻公之裔。五代時有諱仁鎬者爲吳越鎮海節度衙推，居嚴州之分水，子孫遂爲分水人。宋有左司諫縉，仕高宗朝，偁名臣，公之十五代祖也。又數傳至夢聲，仕元爲昆山州學正，家焉，是爲古川先生。古川之五世孫琳。琳子輅，字尚殷，以子倬貴，贈兵部侍郎，公之曾大父也。大父倬，字用檢，號質庵，成化戊戌進士，官至南京兵部右侍郎。弘治中，地始析爲太倉州，遂爲州人。父忬，字民應，號思質，嘉靖辛丑進士，官至總督薊、遼等處軍務，兼理糧餉，都察院右都御史，贈兵部尚書。母郁夫人。

六年丁亥，二歲。

七年戊子，三歲。

八年己丑，四歲。

九年庚寅，五歲。

十年辛卯，六歲。

尚書公舉應天鄉試。

十一年壬辰，七歲。

十二年癸巳，八歲。

十三年甲午，九歲。

十四年乙未，十歲。

十五年丙申，十一歲。

弟世懋生，字敬美。

十六年丁酉，十二歲。

十七年戊戌，十三歲。

十八年己亥，十四歲。

十九年庚子，十五歲。

公受易于山陰駱行簡先生。一日，有鬻刀者，駱戲分韻命之詩。公得漠字，即成句云：

「少年醉舞洛陽街，將軍血戰黃沙漠。」駱大奇之，曰：「異日必以文鳴世。」

二十年辛丑，十六歲。

尚書公登進士，授行人司行人。

二十一年壬寅，十七歲。

侍郁夫人北上。

二十二年癸卯，十八歲。

補州學生。秋，舉應天鄉試。考官侍讀華察、中允閔如霖。是歲，始學爲詩。

二十三年甲辰，十九歲。

二十四年乙巳，二十歲。

尚書公由行人考選，得江西道監察御史。

二十五年丙午，二十一歲。

二十六年丁未，二十二歲。

會試中式。考官孫承恩、張治，皆官吏部侍郎兼翰林院學士。殿試二甲進士。四月，觀政大理寺。同在左寺者凡九人。濮州李先芳伯承與公同年，論詩頗相上下。

二十七年戊申，二十三歲。

是春，大理卿朱公試棘寺春集詩。六月，同舍八人皆授官去，獨公留。未幾，亦授刑部主事。與同官吳維嶽峻伯、王宗沐新甫、袁履善爲詩社。吳偁前輩，名文章家。獨于公文每一篇出，未嘗不擊節稱善。是歲，尚書公以御史巡按湖廣。公配魏夫人來京

師。冬，有事謁陵。

二十八年己酉，二十四歲。

在刑部任。時，伯承、峻伯、新甫、履善或以使事出，或遷去，始與同官歷城李攀龍于鱗定交。自是詩宗大曆以前，文宗西京而上矣。

二十九年庚戌，二十五歲。

在刑部任。與于鱗以詩文相切劘。山人臨清謝榛、茂秦與于鱗善，而長興徐中行子與、南海梁有譽、公實、廣陵宗臣子相先後入社，彬彬偁同調焉。是春，病假，作吳中鄉哲詩廿六篇。後十年，復益爲四十篇云。尚書顧公應祥以七月任，于屬吏中獨推挹于鱗與公。是歲，尚書公自湖廣代還，復按順天。八月，擢都察院右僉都御史，經略通州軍務。

三十年辛亥，二十六歲。

在刑部任。升員外郎。考本集未見升員外郎郎中年月。以三載考滿約計之，是歲當升員外郎。

三十一年壬子，二十七歲。

在刑部任。是歲，公實以病告歸，茂秦亦出都，于鱗乃倡爲五子詩以紀一時交游，彼此各有和詩，實六子也。其三月，尚書公以原官巡撫山東，秋移浙江，而公亦奉使決獄江北。因過江與尚書公遇于吳門，乃旋里。

三十二年癸丑，二十八歲。

在里門。適有倭寇之警，挈家避地吳中。秋，北行過揚州，與吳國倫明卿及宗子相譚宴數日。秋暮抵都，于鱗已出守順德矣。時，于鱗與茂秦有隙。乃重定五子詩，去茂秦而登明卿。

三十三年甲寅，二十九歲。

在刑部任。升郎中。未詳年月。以考滿計之當在是年。七月，尚書公進右副都御史，巡撫大同。子士騏生，側室李氏出。是歲，南昌余曰德德甫入社。其冬，梁公實卒。

三十四年乙卯，三十歲。

在刑部任。初，公與楊忠愍公繼盛同年相厚，迨忠愍以言事下獄，公常省之。至是年忠愍論死西市，公棺斂之。忠愍妻張宜人訟冤疏，公又爲代草。由是爲首輔嚴嵩所惡。是歲，銅梁張佳胤甫入社。當時有「七子」之目，謂前五子及余、張二人也。是歲，尚書公就加兵部右侍郎，總督薊遼，九月，進右都御史。

三十五年丙辰，三十一歲。

在刑部任。春，被命省讞畿輔諸郡。至薊門，聞明卿由給事中謫江西幕，作詩寄之。抵順德，過于鱗郡齋。冬，除山東按察使司副使，備兵青州。以殘臘赴薊州，辭二尊人，遂東行。

三十六年丁巳，三十二歲。

立春日，抵青州任。撰次西曹所作詩。爲金虎集卅二卷、又別集六卷。三月，尚書公降兵部侍郎留任。

三十七年戊午，三十三歲。

在青州任。春日，與吳峻伯提學同游雲門山。按部泰安，再登岱嶽。是夏，作藝苑卮言，至乙丑始成。又撰次朝廷典故爲丁戊小識，後更爲識小錄，即弁山堂別集之初稿也。秋，弟敬美舉順天鄉試。

三十八年己未，三十四歲。

在青州任。撰青州兵備道副使題名記。又撰次詩文爲海岱集十二卷。又撰少陽叢談二十卷。案部泰安，再登岱嶽。春，弟敬美登進士。六月，尚書公以御史論劾，逮下獄。公在任聞之，即自劾罷入都。橐籥之暇，杜門出處。惟吏部郎張助甫旬一再至。

三十九年庚申，三十五歲。

在都下。有幽憂集二卷。時，獄事少緩，尚書公促公歸視先壟。甫返里，又有惡耗。復北行人都省視。十月朔，尚書公論大辟。公號慟欲絕，與敬美扶櫬南下。十一月廿七日抵里。

四十年辛酉，三十六歲。

歲饑，盜數起。乃奉太夫人偕婦子移入城居。別構丙舍于稟葬之側，每日進食哀號。

四十一年壬戌，三十七歲。

五月，嚴嵩罷相。

四十二年癸亥，三十八歲。

公持尚書公喪，蔬食，三年不御內寢。至是除服，猶却冠帶，苴履葛巾，不赴宴會。惟詩酒夙所嗜，藉以澆磊塊暢怫鬱而已。閒游吳中，與俞允文、周公瑕、袁魯望、張伯起昆弟酬倡。而敬美詩文日進，于鱗詒書有「小美」之目。秋，訪子與于長興。

四十三年甲子，三十九歲。

春日，至吳中，游靈岩、銅坑諸山。其秋，游支硎、天池、天平諸山。是歲，始構離菴園于城居之傍。

四十四年乙丑，四十歲。

有元日試筆詩。八月十八日，觀潮季生所。是歲，刊藝苑卮言六卷。

四十五年丙寅，四十一歲。

春日，在吳中飲張氏伯仲園。九月，游靈岩山，又游宜興張公、善權二洞。冬，以瘡瘍卧床蓐累月。次子士驥生，側室高氏出。是歲，始營別業于隆福寺西，建閣貯藏經，名之曰小祇林，亦偁小祇園。

穆宗隆慶元年丁卯，四十二歲。

春初北行，伏闕上疏，爲尚書公辨冤，言爲嵩所害。時，華亭徐文貞公階爲首輔，頗左右之，得旨准復原官。公遂歸，過揚州。南海歐楨伯來訪舟次。于鱗赴浙臬，于吳門相遇。二年戊辰，四十三歲。

三月，詔求直言。公疏陳八事。四月，以言官薦，起爲河南按察使司副使，整飭大名兵備。公以病辭，不允。六月，赴任。途中再以病辭，仍不允。會于鱗輩詣書以大義曉公，乃以八月抵大名任。奉檄赴易州，往返千餘里。又閱眎龍泉、娘子諸關口。敬美亦起爲南京禮部主事。除夕，得擢浙江布政使司左參政、分守湖州之報。即與于鱗爲代。三年己巳，四十四歲。

在大名任。有元日試筆詩。正月十六日，與于鱗會于齊河，即南行。取道南京，與敬美會于天界寺，留連五日乃別。四月，抵湖州任。秋，湖州水災，公捐俸助賑，又疏乞改折糧十五萬石。是歲，季子士駿生，李氏出。

四年庚午，四十五歲。

在湖州任。元日，日食。有試筆詩。尋拜山西按察使之命，即還里侍太夫人湯藥。上疏引病乞休，不允。太夫人尋病痊，乃以六月啓行。七月十六日，到山西任。監鄉試，撰五策及試錄後序。九日，登鎮樓小宴。十月，聞太夫人病劇，上疏乞休，即日南行。

至澤州而訃至，扶服奔喪，哀感行路。是歲，敬美遷禮部員外郎，亦先以病辭免，未抵家而得訃。

五年辛未，四十六歲。

始居小祇園。

六年壬申，四十七歲。

九月，與敬美游洞庭兩山。

冬至日，張助甫過訪。

是歲，重定藝苑卮言，益爲八卷、

又附錄四卷。

神宗萬曆元年癸酉，四十八歲。

正月，服除。

華亭相公來游小祇園。

起湖廣按察。六月，自家啓行，七月望，過黃

州。守巡諸公招游赤壁。八月初抵任。監鄉試，撰五策及試錄後序。

十月，擢廣西

布政使司右布政。遂泛大江東還，過九江，游廬山。歲莫，抵家，得擢太僕寺卿之報。

是歲，敬美仍補禮部。

二年甲戌，四十九歲。

二月，北行。吳門錢穀叔寶爲作紀行圖，起小祇園至廣陵，凡卅二幀。叔寶弟子張復附

公舟北上，所至屬圖之，又得五十幀。行至徐州，改道從陸，以三月望後到太僕任。六

月，朝退，于午門前觀文皇帝所御槍。九月，遷右副都御史，撫治鄖陽，提督軍務。冬

赴任。所轄湖廣之荊州、襄陽、鄖陽、河南之南陽、陝西之漢中，凡五府。成化十二年始設撫治都御史，以原杰爲之。萬曆二年加提督、軍務。是歲，敬美遷尚寶司丞。三年乙亥，五十歲。

在鄖陽任。三月，游太和山。五月，荆、襄地震。公上疏，言地陰也，法當安靜。今西虜邀求互市，松潘屬番，伏莽已徵。外家之請乞無厭，少府之賜發不已。安像徵符絡繹不絕，皆邇年所未有。涓涓之流，不容不慮。六月，有妖僧妄稱韓府樂平王次子融焯，奉高皇帝御容行游天下，要撫按大小衙門接待。公上疏，言宗室不許擅自出城，定例甚嚴，融焯既係天潢近屬，不畏國典，騷擾官府，難以輕處。請敕禮部押送韓府面證確的，少飭宗正之條，薄示郵傳之警。其秋，作九友齋歌，以寄思歸之興。「九友」者，山、水、法書、石刻法籍、名畫、二藏經、古杯勺并自作詩文也。是歲，撰定前後詩、賦、文、說爲四部稿，次年刻成，凡百八十卷。

四年丙子，五十一歲。

在鄖陽任。穀日登鄖城東北樓，時四山雪霽，因題「春雪樓」。敬美奉使吊祭秦藩，尋赴江西參議新任。取道過鄖，同公登太和絕頂。秋，有旨除南京大理寺卿。以八月解節歸，未之任，爲南給事楊節論劾。得旨回籍聽候別用。自是棲息弇山園，身雖退而名益重矣。弇山園即小祇林。壬申以後，增置樓閣樹石，游覽之勝，甲于東吳，因取山海

經語名之。

五年丁丑，五十二歲。

春日過松江，莫方伯子良與子雲卿餞行。夏，徐子與赴江西布政任，來訪，遇于昆山。

六年戊寅，五十三歲。

元日家宴，有試筆詩。冬間推應天府尹之命，有述懷詩。將赴任，行抵丹陽，聞南臺有

論章，即返權。十一月抵家，有「能如五日張京兆，又作當年柳士師」之句。時，同里王

錫爵元馭以禮部右侍郎告歸，與公往還無間。

七年己卯，五十四歲。

南京給事中王良心、御史王許之交章劾公，得旨仍回籍聽用。公亦上疏申辯。報聞。

是歲，徐子與卒于江西，喪還，公往長興哭之。過湖州，游峴山。

八年庚辰，五十五歲。

四月，始謁曇陽子訪道，自稱「弟子」。敬美自江西入覲，暫歸里，亦從曇陽問道，尋還江

西。九月，曇陽化去，公爲作傳，敬美書之。時，敬美以提學陝西，便道過家，留旬日別

去。十月朔，移居白蓮精舍，閉關謝筆硯，而故人問訊不絕，又多以詩及者，公作詩志

苦。

九年辛巳，五十六歲。

是歲，給事中牛維垣、御史孫承南以曇陽事劾王元馭，并及公兄弟，謂其誣妄。有旨報聞，不竟其事。敬美遂乞休旋里，別築澹圃于城西南隅，去弇園半里許。

十年壬午，五十七歲。
元日，與敬美祝聖小飲。秋，公長子士騏舉應天鄉試第一。科道薦舉人材，公名與焉。

十一年癸未，五十八歲。

元日，過敬美小酌。張肖甫自浙撫遷右都御史、行兵部侍郎，過吳來訪弇園。沈純甫、汪仲嘉、邢子愿亦先後過訪。是歲，有重紀五子篇、二友篇、末五子篇、八哀篇、四十咏、十咏。敬美起浙江提學，辭不赴。

十二年甲申，五十九歲。

正月，仍起用爲應天府尹。二月，推升南京刑部右侍郎。先後具疏以病辭。得旨準在籍調理。公避喧村中故居。子士騏稍爲葺治，名之曰「約圃」。冬，敬美起爲福建提學。是歲，吳明卿、李本寧、汪伯玉、徐孟孺、胡元瑞、張肖甫先後過訪。

十三年乙酉，六十歲。

元旦，試筆有「孤眠一千八百日，尚作六十尋常身」之句。夏，王元馭大拜人，都趙汝師領少司成，俱過草堂話別。少保戚元敬亦過訪。仲冬，公生日，于泖塔避客。

十四年丙戌，六十一歲。

敬美遷福建布政使司左參政，入賀，便道過里。尋升南京太常寺卿。仲冬，公生日，與敬美及子孫小飲，有「詩書馥郁見三代，骨肉都盧完十人」之句。

十五年丁亥，六十二歲。

蘇州撫按具疏爲尚書公請恤典。禮部題覆，得賜祭葬。公復上疏，申請得贈兵部尚書，又有謝恩疏。是冬，南京禮部尚書袁洪愈特薦公自代。吏部推補公南京兵部右侍郎。公具疏辭免，不允。敬美自南太常卿辭病歸。

十六年戊子，六十三歲。

二月，赴留都，過吳門游徐少參園。三月朔到任，謁孝陵，游靈谷寺，餞袁尚書抑之于燕子磯，又與諸公游牛首諸山及徐氏東園、西園、徐公子萬竹園、朱王孫同春園。四月，游王氏園看芍藥。五月，游武氏園、姚氏園、徐三錦衣北園。閏六月，敬美卒于里門。公再具疏請致仕，不允。八月，游高坐寺。

十七年己丑，六十四歲。

春日，與諸公會飲趙中貴園亭，又游徐氏東園鳳臺園、金盤李故園、莫愁湖故園、李臨淮竹園。三月，子士騏登進士，授兵部主事。六月四日，以三品考滿離任北行。十三日，行抵淮安，得升南京刑部尚書之命，遂南還。廿二日，到家，謁先祠，哭弟敬美殯所。

至嘉定游徐宗伯叔明歸有園。八月廿七日，到任。南京御史黃仁榮劾公考滿欺冒。奉旨照舊供職。公上疏申辯。冬，上乞休疏，不允。

十八年庚寅，六十五歲。

正月，再上疏乞致仕。三月廿五日，得邸報，奉旨準回籍調理，次日即行。四月，抵里，鍵戶謝客，詩文亦漸不作。其冬，手條家戒及身後斂葬諸儀，預剋死期。至日，與僧某從容譚笑，說偈而逝。訃聞，贈太子少保，予祭二壇，賜金四百兩，遣官治葬。公歸田，九月而卒，年六十有五。見王文肅公所撰神道碑。它書云萬曆二十一年卒者誤。

年譜跋

昔從先師游，第知有二洪及放翁年譜而已。癸亥之春，刊三譜畢，以印本郵呈，先師復書，亦不言尚有它種也。先師既歸道山，行狀中載所著書目錄，方知又有王伯厚、王元美兩先生年譜，亟索諸先師之家，僅得元美譜，其伯厚譜久之始檢得寄來，乃續刊之，合爲五種。元美爲吾州人，與王文肅公元馭同姓同時而異望，一爲郎邪，一爲太原。兩家世澤綿遠，代有聞人。先師又嘗作二王氏世系表，當別入養新錄也。嘉慶十有二年歲次丁卯夏四月，受業弟子李賡芸謹跋。